

BUSINESS Info Newsletter

JULI 2019 // BROJ 76

U ovom broju, između ostalog, čitajte:

- **Poslodavci protiv Prednacrta Zakona o PDV-u kojeg je predložila UIO BIH**
- **UO UPFBiH: Poslodavci će tužiti JP Ceste FBiH zbog šteta izazvanih rekonstrukcijom tunela Vranduk**
- **Na inicijativu UPFBiH izmijenjen Pravilnik o obliku, sadržaju i načinu vođenja trgovачke knjige**
- **UPFBiH traži od Vlade FBiH da se što prije izjasni o zakonskim rješenjima dostavljenim u okviru „Inicijative 20+5+6“**
- **UPFBiH pozdravlja obnovu socijalnog dijaloga u FBiH**
- **Komšić sa poslodavcima: Rasteretiti privredu i smanjiti nezaposlenost**

Upravni odbor UPFBiH: Uvažiti primjedbe poslodavaca na Prednacrt zakona o PDV-u kojeg je predložila UIO BiH



Upravni odbor Udruženju poslodavaca Federacije Bosne i Hercegovine smatra neprihvatljivim donošenje Prednacrta zakona o PDV-u kojeg je pripremila Uprava za indirektno oporezivanje BiH, saopćeno je nakon

sjednice Upravnog odbora UPFBiH, održane 22. jula 2019. godine.

„Predložena rješenja novog Zakona o PDV-u, nisu u interesu povećanja likvidnosti kompanija i poboljšanja poslovnog ambijenta, niti će doprinijeti kvalitetnijem uređenju oblasti indirektnih poreza i rastu prihoda”, kazao je predsjednik Udruženja poslodavaca FBiH Adnan Smailbegović nakon sjednice UO.

Iz Udruženja ukazuju na neophodno uključivanje zainteresirane javnosti u sve faze izrade propisa, što je u skladu sa Direktivama EU i zakonodavstvom zemalja EU.

Također napominju da su brojna pitanja i problemi sa kojima su se poslodavci susretali

u praksi i dalje ostala neriješena. Odredbe predloženog prednacrta su neprecizno definirane i nejasne, tako da se ponovno ostavlja mogućnost proizvoljnog tumačenja.

„U Prednacrtu zakona o PDV nema suštinskih izmjena u odnosu na važeći Zakon. Ono što je bitno napomenuti jeste da predlagači nisu uvažili i u tekst Prednacrta uvrstili niti jedan zahtjev UPFBH, kao što su



pomjeranje roka plaćanja PDV-a sa 10. na posljednji dan u mjesecu, plaćanje poreza po naplati fakture za male poreske obaveznike te nemogućnost obračuna odbitnog PDV-a za neplaćene fakture. Radi se o prijedlozima koji su sadržani u zakonskim rješenjima za oblast PDV-a u zemljama regiona i EU", ističe Smailbegović.

Također naglašava da ako donošenje novog Zakona o PDV-u ima za cilj usklađivanje sa Direktivama EU, u novi Zakon treba ugraditi i zahtjeve poslodavaca u pogledu pomjeranja roka plaćanja PDV-a i plaćanje PDV-a po naplati fakture, koji su u cijelosti usklađeni sa Direktivama EU.

U novom Prednacrtu predviđeno je povećanje praga za obaveznu registraciju sa postojećih 50.000 na 75.000 KM, a da prijedlog ne predviđa mogućnost kvartalnog podnošenja prijave, kako je to, na primjer, regulirano u Srbiji i Hrvatskoj.

I dalje je ostala neuređena oblast naplate PDV-a za prevoznike, čime se domaći prijevoznici stavlju u nepovoljan položaj u odnosu na strane, na što UPFBiH godinama upozorava.

„Zbog svega navedenog, UO UPFBiH ne podržava donošenje Zakona o PDV-u u ovakvom tekstu i pozvao je zastupnike u Parlamentu FBiH i NSRS, kao i Parlamentu BiH, da ne podrže novi Zakon o PDV-u.

Poslodavci protiv Prednacrta Zakona o PDV-u kojeg je predložila UIO BIH

Uprava za indirektno oporezivanje BiH pripremila je prednacrt novog Zakona o PDV-u, a kao razlog za njegovo donošenje navodi se usklađivanje odredbi sa Direktivama EU za oblast indirektnih poreza. U Udruženju poslodavaca Federacije Bosne i Hercegovine naglašavaju da je proklamovano usklađivanje sa Direktivama EU urađeno vrlo selektivno, kako u pripremi, tako i u predloženim zakonskim rješenjima.

Podsjećaju da Direktive EU propisuju da zainteresirana javnost mora biti uključena u sve faze izrade propisa, što podrazumijeva mogućnost podnošenja inicijative za donošenje izmjena i dopuna propisa, učešće u izradi radnog materijala, kao i učešće u konsultacijama i javnim raspravama.

„U Prednacrt Zakona o PDV-u nije ugrađena nijedna od ključnih primjedbi UPFBiH, kao što

su pomjeranje roka plaćanje PDV-a sa 10. na posljednji dan u mjesecu, plaćanje poreza po naplati fakture za male poreske obveznike te nemogućnost priznavanja odbitnog PDV-a za neplaćene fakture. Predloženi nacrt je samo 'autističan' pokušaj donošenja zakonskog rješenja koje samo na prvi pogled ima za cilj prikupiti što više sredstava po osnovu PDV-a", ističu iz UPFBiH.

U UPFBiH naglašavaju da Prednacrt Zakona o PDV-u nije reformski, niti stimulativan za privredu pa u tom smislu neće dovesti do povećanja privrednih aktivnosti, niti proširenja poreske osnovice za prikupljanje PDV-a.

„Zbog svega navedenog, Udruženje poslodavaca FBiH ne podržava donošenje Zakona o PDV-u u ovakovom tekstu i poziva zastupnike u Parlamentu FBiH i NSRS, kao i Parlamentu BiH, da ne podrže novi Zakon o PDV-u, u predloženom obliku. Također, UPFBiH poziva UIO da ozbiljno pristupi izradi teksta Zakona o PDV-u uzimajući u obzir dosadašnju praksu i iskustva primjene Zakona te kroz preciznije definisanje odredbi omogući da Zakon bude primjenljiv u praksi", stav je UPFBiH.

UO UPFBiH: Poslodavci će tužiti JP Ceste FBiH zbog šteta izazvanih rekonstrukcijom tunela Vranduk



Na posljednjoj sjednici Upravnog odbora Udruženja poslodavaca FBiH održanoj početkom ove sedmice razmatrani su problemi štete koju trpi privreda BiH zbog rekonstrukcije tunela Vranduk, kao i moguće posljedice najavljene rekonstrukcije tunela Crnaja.

Na sjednici je istaknuto da je rekonstrukcija tunela Vranduk koja traje od jeseni prošle godine već nanijela ogromne štete privredi BiH, a neke procjene govore da šteta za privredu i stanovništvo iznosi oko milion KM dnevno. Također je rečeno da su zbog nemogućnosti normalne i pravovremene komunikacije, pojedine kompanije primorane ugasiti dijelove firme smještene u drugim gradovima i dati otkaze radnicima.

Članovi UO UPFBiH naglasili su da za nastalu štetu neko mora snositi odgovornost, naročito ako se ima u vidu da investitor i izvođači radova nisu pravovremeno osigurali adekvatan alternativni pravac. Naime, ovaj pravac koji se trebao koristiti kao

alternativni nije prethodno bio saniran i pripremljen da ga koriste teretna i druga motorna vozila, tako da se ne može koristiti. Alternativni pravac je saniran istovremeno sa rekonstrukcijom tunela Vranduk što je nedopustivo.

Najveću odgovornost za velika oštećenja koja ugrožavaju sigurnost saobraćaja na alternativnom pravcu snosi Javno preduzeće Ceste Federacije BiH, jer nisu pravovremeno iskoordinirali njegovu pripremu za neometano odvijanje putničkog i teretnog saobraćaja.

Također je upitna i dužina rokova za izvođenje radova na rekonstrukciji tunela Vranduk u trajanju od 18 mjeseci, naročito ako se ima u vidu činjenica da se radi o glavnoj putnoj komunikaciji i privrednoj poveznici sjever-jug.

Zbog svega navedenog, privrednici su od UPFBiH tražili da, u njihovo ime, pokrene postupak za naknadu štete tužbom protiv JP Ceste FBiH.

S obzirom da je najavljenja rekonstrukcija tunela Crnaja na putnom pravcu M17, također, jednoj od ključnih saobraćajnica u BiH, iz UO UPFBiH upozoravaju Vladu FBiH i JP Ceste FBiH da radovi na rekonstrukciji tunela Crnaja ne smiju početi prije nego se završe radovi na rekonstrukciji tunela Vranduk.

Poslodavci naglašavaju da bi u slučaju da radovi na rekonstrukciji tunela Crnaja započnu prije nego se završi tunel Vranduk, na jednom putnom pravcu M17 koji povezuje sjever-jug i koji je žila kucavica, bile bi dvije obustave saobraćaja što je

upotpunosti neprihvatljivo za bh. privrednike i što bi dovelo do šteta za privredu koje se mogu mjeriti stotinama miliona KM.



Također, UO UPFBiH od Vlade FBiH i JP Ceste FBiH traži da se prije početka rekonstrukcije tunela Crnaja osigura adekvatan alternativni pravac za neometano odvijanje teretnog i

putničkog saobraćaja. Ukoliko adekvatan putni pravac ne bude osiguran iz UO UPFBiH najavljuju kolektivnu tužbu za naknadu štete.

Iz UO UPFBiH naglašavaju da niko nije protiv rekonstrukcije putne infrastrukture, ali da nije jasno zašto se tom poslu ne prilazi koordinirano i u skladu sa aktivnostima na izradi koridora Vc.

Na inicijativu UPFBiH izmijenjen Pravilnik o obliku, sadržaju i načinu vođenja trgovačke knjige



S ciljem unaprjeđenja i olakšanja poslovanja trgovaca na području Federacije BiH, Ministarstvo trgovine Federacije BiH je donijelo Pravilnik o dopunama Pravilnika o obliku, sadržaju i načinu vođenja trgovačke knjige, koji je stupio na snagu 6.7.2019. godine.

Ovim dopunama Pravilnika omogućeno je trgovcima da izradu, evidenciju i pohranu kalkulacije cijena vrše elektronski, te da ih štampaju samo na zahtjev inspekcijskih organa.

Prema riječima federalnog ministra Zlatana Vujanovića dopune Pravilnika donesene su na inicijativu Udruženja poslodavaca Federacije BiH s kojim Federalno ministarstvo trgovine ima odličnu saradnju.

Do donošenja ovih dopuna svi trgovci su bili u obavezi da štampaju i ovjeravaju kalkulacije cijena i da ih pohranjuju u štampanom obliku. Po procjeni Udruženja poslodavaca FBiH troškovi papira, štampanja, ovjere i pohranjivanja kalkulacije cijena,

kao i radnika angažovanih na ovim poslovima na godišnjem nivou za veće trgovačke privredne subjekte premašuju iznos od 100.000 KM.

Stupanjem na snagu ovog Pravilnika smanjit će se troškovi poslovanja trgovaca, dok će se sa druge strane, zbog lakšeg i preglednijeg praćenja kalkulacija cijena u elektronskoj formi, unaprijediti sistem inspekcijskog nadzora.

Ništa manje zanemariv nije ni ekološki utjecaj koji ukidanjem obavezne štampane forme, što implicira znatno manje korištenje papira i tonera, u konačnici daje i značajan doprinos očuvanju okoliša, saopćeno je iz Federalnog ministarstva trgovine.

Udruženje poslodavaca FBiH izražava zahvalnost Ministarstvu trgovine FBiH na izuzetnoj saradnji koja je dokaz da Ministarstvo, zajedno sa Udruženjem, aktivno radi na rasterećenju poslovnog ambijenta.

UPFBiH traži od Vlade FBiH da se što prije izjasni o zakonskim rješenjima dostavljenim u okviru „Inicijative 20+5+6“

Iz Udruženja poslodavaca Federacije Bosne i Hercegovine traže da Vlada FBiH postupi u skladu sa zaključkom Zastupničkog doma Parlamenta Federacije BiH i što prije u parlamentarnu proceduru dostavi prijedloge zakonskih rješenja koje je pripremilo UPFBiH u okviru „Inicijative 20+5+6“.

„Inicijativa 20+5+6“ je većinom glasova podržana na tematskoj sjednici Zastupničkog

doma PFBiH, održanoj sredinom aprila 2019. godine. Tada je zaključeno da zakone trebaju pripremiti Federalna vlada i resorna ministarstva te ih uputiti u parlamentarnu proceduru u roku od 60 dana, u



skladu s Ustavom FBiH. Vlada FBiH je bila zadužena da u istom roku bude održana i sjednica Ekonomsko-socijalnog vijeća za teritoriju FBiH. Do danas, zaključci Zastupničkog doma Parlamenta FBiH sa sjednice nisu implementirani.

„Danas je 82. dan otkako je sjednica održana, a od Vlade FBiH nismo dobili nikakvu povratnu informaciju. Dobar dio zakona koje smo mi predložili je već u parlamentarnoj proceduri i na njih se može amandmanski djelovati i dodatno ubrzati proces razmatranja i usvajanja. Još jednom naglašavamo da prijedlozi zakonskih rješenja koja je UPFBiH dostavilo Vladi i Parlementu FBiH dovesti do poboljšanja poslovnog ambijenta, smanjenja nezaposlenosti, smanjenja sive ekonomije, povećanja plaća što bi smanjilo ili ublažilo odlazak radno sposobnog stanovništva. Također, usvajanje ovih zakonskih rješenja neće ugroziti vanbudžetske fondove i budžete. U proteklih više od dva mjeseca mi iz UPFBiH smo razgovarali sa šefovima političkih stranaka koje participiraju u Parlementu FBiH, sa zastupnicima u FBiH kako bi im približili ovu tematiku. Od njih smo dobili podršku i očekujemo da će zakonska rješenja koja smo predložili imati visok stepen prolaznosti", kazao je predsjednik UPFBiH Adnan Smailbegović.

Članica Upravnog odbora UPFBiH i direktorica GS-TMT Snježana Koprunic istaknula je da bi usvajanje zakona u okviru "Inicijative 20+5+6" značajno doprinijelo konkurentnosti bh. privrede.



„Usvajanje ovih zakona bi smanjilo troškove rada i omogućilo bi povećanje plaća radnicima u BiH. Nastojimo da se minimalna plaća u FBiH sa sadašnjih oko 400 KM podigne na 500 ili 600 KM, što je moguće uz

smanjenje postojeće stope doprinosu. Nas proizvođače i izvoznike najviše muči velika stopa doprinosu koji su u EU u prosjeku 29 posto. Prijedlog Vlade FBiH je 33 posto, a UPFBiH je dalo prijedlog od 26,5 posto, što mislimo da bi bilo atraktivno i za one poslodavce koji djeluju u području sive ekonomije da se vrate u normalne tokove, čime bi se povećala izdvajanja za doprinose. Ovi zakoni su u interesu i radnika i poslodavaca i države te bih apelirala na Vladu FBiH da ih što prije razmatra ozbiljno kako bi nam pomogla da povećamo konkurentnost i plaće radnicima", naglasila je Koprunic.

Član ESV-a FBiH i direktor Bihaćke pivovare Edin Ibrahimpašić naglasio je značaj organiziranja poslodavaca na nivou kantona s obzirom da se dosta pitanja od važnosti za privrednike rješava na nivou kantonalnih vlada i parlamentata. Podsjetio je i na

migrantsku krizu na području Unsko-sanskog kantona koja dodatno otežava poslovanje privrednika u ovom kantonu.

„Sve izmjene i dopune zakona koje idu u korist



poslodavcima usvajaju se vrlo sporo, a sve ono što se može riješiti pravilnikom na nivou ministarstava, a šteti poslodavcima rješava se vrlo brzo", kazao Ibrahimpašić.

„Inicijativa 20+5+6" odnosi se na inicijativu UPFBiH koja je sredinom marta upućena Vladi i Parlamentu FBiH za usvajanje inicijativa i zakona. Među ovim zakonima je i pet zakona o izmjenama i dopunama zakona koje su Vladi i Parlamentu FBiH dostavljene sredinom 2018., a odnose se na zakone o zdravstvenom osiguranju, o fiskalnim sistemima, o cestovnom prometu, privatizaciji preduzeća, profesionalnoj rehabilitaciji, ospozobljavaju i zapošljavanju lica s invaliditetom, koji će biti razmatrani po skraćenom postupku. Osim toga, UPFBiH je pripremilo još 20 tekstova zakona, među kojima su novi tekstovi zakona o finansijskom poslovanju, registraciji privrednih društava, stečaju, zaštiti na radu, štrajku, mirnom rješavanju sporova, posredovanju u zapošljavanju i socijalnoj sigurnosti nezaposlenih osoba, porezu na dohodak sa analizom, doprinosima sa analizom, računovodstvu i reviziji, federalnim administrativnim taksama i Tarifi federalnih administrativnih taksi te o Ekonomsko-socijalnom vijeću (ESV) FBiH.

Također su pripremljene izmjene i dopune Zakona o zdravstvenom osiguranju, Zakona o profesionalnoj rehabilitaciji, osposobljavanju i zapošljavanju osoba sa invaliditetom, Zakona o privrednim društvima, Zakona o fiskalnim sistemima, Zakona o porezu na dobit, Zakon o zdravstvenoj zaštiti, Zakon o naftnim derivatima, te Zakona o sudskim taksama u postupku pred Vrhovnim sudom FBiH.

UPFBiH pozdravlja obnovu socijalnog dijaloga u FBiH

U Udruženju poslodavaca Federacije BiH ohrabreni su sastankom kojeg je 01. jula 2019. godine organizirala Vlada Federacije BiH, te ga smatraju prvim korakom u obnovi socijalnog dijaloga u FBiH.

Sastanku u Vladi FBiH su prisustvovali premijer FBiH Fadil Novalić i njegovi zamjenici, ministrica finansija Jelka Miličević i ministar za rad i socijalnu politiku Vesko Drljača, predstavnici granskih sindikata, predstavnici Udruženja poslodavaca FBiH te predsjednik Ekonomsko-socijalnog vijeća za teritoriju FBiH Edhem Biber.

Na sastanku je razgovarano o Prednacrtu zakona o reprezentativnosti FBiH, a predstavnici Vlade FBiH su željeli čuti stavove socijalnih partnera o sadržaju Prednacrta prije nego ga usvoje i upute u parlamentarnu proceduru.

"Nakon prekida socijalnog dijaloga koji je trajao više od godinu dana, tokom kojih nisu održavane sjednice Ekonomsko-socijalnog vijeća za teritoriju FBiH, sastanak u Vladi FBiH

smatramo pozitivnim pomakom u pravcu obnavljanja dijaloga i uključivanja socijalnih partnera u procese i procedure donošenja zakonskih rješenja koja su od interesa za sve. Nadamo se da ovo neće biti jedini sastanak ove vrste i da će u narednom periodu uslijediti i novi sastanci socijalnih partnera na kojima ćemo kroz socijalni dijalog i konsenzus nastojati doći do najboljih rješenja za rasterećenje privrede i poboljšanje poslovnog dijaloga”, kazali su u UPFBiH.

Sastanak predstavnika Vlade, sindikata i poslodavaca



U zgradi Vlade FBiH 09. jula održan je sastanak premijera FBiH Fadila Novalića i federalnih ministara rada i socijalne politike Veska Drljače i energije rudarstva i industrije Nermina Džindića s predstavnicima grupacije industrijskih sindikata iz metalske industrije,

elektroprivrede, građevinarstva, tekstila i kože, šumarstva i rudarstva, te predstavnika Udruženja poslodavaca FBiH.

Razgovarano je o setu zakona koji su od posebnog interesa za radnike. Predstavnici sindikata pozdravili su odluku Vlade kojom su u Budžetu FBiH predviđena sredstva za uvezivanje radnog staža, te iznijeli zahtjev da budu i uvećana ako to bude potrebno.

Također je istaknuta važnost što hitnijeg usvajanja Zakona o sigurnosti na radu koji je već duži period u parlamentarnoj proceduri.

Posebna pažnja posvećena je razmatranju Nacrta zakona o štrajku, te istaknuta potreba da se sva preostala sporna pitanja usaglase između predstavnika sindikata i poslodavaca u što kraćem periodu. Na kraju je zaključeno da socijalni dijalog nema alternativu, da ga u narednom periodu treba intenzivirati i da rad Ekonomsko-socijalnog vijeća za teritoriju FBiH ne može biti talac nikakvih politika kao ni nefunkcioniranja Saveza samostalnih sindikata BiH, što je trenutno slučaj.

Komšić sa poslodavcima: Rasteretiti privredu i smanjiti nezaposlenost



Član Predsjedništva Bosne i Hercegovine Željko Komšić primio je 02. jula 2019. godine u radnu posjetu delegaciju Udruženja poslodavaca Federacije Bosne i Hercegovine na čelu sa predsjednikom Adnanom Smailbegovićem i direktorom Mladenom Pandurevićem, te članovima Udruženja Safudinom

Čengićem, Snježnom Kopruncer, Edinom Ibrahimpašićem i Venanom Hadžiselimovićem.

Tokom razgovora sa članom Predsjedništva Bosne i Hercegovine poslodavci su istakli želju

da preuzmu svoj dio tereta pri procesu stvaranja povoljnijeg zakonodavnog oblika koji će omogućiti i radnicima i poslodavcima i državi bolje uslove uslove rada.

Udruženje poslodavaca Federacije BiH predložilo je set zakona i inicijativa na kojima su radili zajedno sa akademskom zajednicom i sindikatima. Član Predsjedništva Bosne i Hercegovine Željko Komšić izrazio je podršku prijedlozima, te najavio aktivan politički angažman s ciljem realizacije predloženog.

S tim u vezi, poslodavci su naveli da će usvajanje predloženih zakona dovesti do nužnog rasterećenja privrede, što za daljnju posljedicu ima smanjenje nezaposlenosti. Istaknuta je i podrška međunarodnih organizacija kao i ambasada zemalja zainteresiranih za ekonomsko i privredno jačanje Bosne i Hercegovine.

Sagovornici su se složili o potrebi izjednačavanja prava i mogućnosti u javnom i privatnom sektoru. Također, razgovarano je i o utvrđivanju minimalne cijene rada, konkurentnosti bosanskohercegovačke privrede, te smanjenju sive ekonomije.

Delegacija UPFBiH sa predstavnicima DF-a

Delegacija Udruženja poslodavaca FBiH razgovarala je 02. jula 2019. godine sa šefom Kluba DF-GS u Zastupničkom domu Parlamenta FBiH i saradnicima o "Inicijativi 20+5+6". "Inicijativa 20+5+6", koju je pripremilo Udruženje poslodavaca FBiH, prihvaćena je većinom glasavo na tematskoj sjednici Zastupničkog doma Parlamenta FBiH održanoj 10. aprila, a rezultirat će rasterećenjem privrede, smanjenjem sive ekonomije i poboljšanjem fiskalne discipline, smanjenjem nezaposlenosti, povećanjem plaća i investicija, podizanjem konkurentske sposobnosti domaće privrede, pojednostavljenjem i ubrzavanjem administrativnih procedura, kao i smanjenjem troškova poslovanja.

Sastanak sa predstavnicima DF-a predstavlja nastavak aktivnosti djelovanja UPFBiH prema parlamentarnim strankama. Na sastanku je predstavnicima DF-a detaljnije obrazložena Inicijativa, te je razgovarano o mogućnostima davanja podrške za usvajanja inicijative.

UPFBiH i SDP BiH o "Inicijativi 20+5+6" i Zakonu o minimalnoj plaći

Predstavnici Udruženja poslodavaca FBiH su danas održali sastanak sa predstavnicima SDP-a BiH na kojem su razgovarali o inicijativi Uduženja za poboljšanje poslovnog ambijenta i Zakonu o minimalnoj plaći. Predstavnici SPD-a već ranije su istakli da će podržati smanjenje poreza i doprinos, predloženo od strane Udruženja, te da je potrebno usvojiti i zakon o minimalnoj plaći koji su pripremili.

Predstavnici UPFBiH sa Radončićem i Nikšićem o poboljšanju poslovnog ambijenta



Na inicijativu Udruženja poslodavaca FBiH, predsjednik Saveza za bolju budućnost Fahrudin Radončić i predsjednik Socijaldemokratske partije BiH Nermin Nikšić održali su radni ručak sa predsjednikom i direktorom Udruženja poslodavaca FBiH

Adnanom Smailbegovićem i Mladenom Pandurevićem.

"Ugodan ručak i teške teme kako pomoći domaćim poduzetnicima da uposle što više ljudi i zaustave masovni odlazak iz Bosne i Hercegovine. Impresioniran sam njihovom brigom i opcijama kako da se povećaju plaće uposlenicima. Rekao bih da je ovo bio skup istomišljenika", istakao je Radončić.

Prisutni su razgovarali o "Inicijativi 20+5+6" koju je pripremilo Udruženje poslodvaca FBiH s ciljem olakšanja poslovnog ambijenta i ubrzanja ekonomskog rasta i razvoja Bosne i Hercegovine.

Sjednica Pravnog i ekonomskog savjeta UPFBiH o Prednacrtu zakona o porez na dodatnu vrijednost

Članovi Pravnog i ekonomskog savjeta Udruženja poslodavaca FBiH na sjednici održanoj 04. jula 2019. godine detaljno su analizirali Prednacrt zakona o porezu na dodatnu vrijednost.

Zakon će se naći na dnevnom redu iduće sjednice Upravnog odbora UPFBiH kada će se predložiti da članovi Upravnog odbora zauzmu zvaničan stan Udruženja po pitanju navedenog zakona.

Razgovor sa šefom Delegacije EU u BiH

Evropska komisija je 29. maja 2019. godine usvojila svoje Mišljenje o zahtjevu BiH za članstvo u Evropskoj uniji. Mišljenje je od ključne važnosti u odnosima Evropske unije i Bosne i Hercegovine, potvrda da je EU predana da pruži smjernice i podršku zemlji u provođenju neophodnih reformi na njenom putu ka evropskim integracijama.

Mišljenje identificira 14 ključnih prioriteta koje zemlja treba da ispunji kako bi dobila preporuku za otvaranje pregovora o pridruživanju EU, te pruža sveobuhvatne smjernice za postepene reforme. Ključni prioriteti obuhvataju područja demokratije/funkcionalnosti, vladavine prava, osnovnih prava i reforme javne uprave – osnove procesa pridruživanja Evropskoj uniji.

Analitički izvještaj koji je priložen uz Mišljenje, po prvi put, upoređuje situaciju u Bosni i Hercegovini sa standardima koji se primjenjuju u zemljama članicama EU, uključujući pitanja kao što je unutrašnje tržište, javne nabavke, politika konkurentnosti, okoliša, sigurnosti hrane i zaštite potrošača. Mišljenje pruža čvrstu osnovu za diskusiju u Vijeću Evropske unije koje treba da donese odluku o narednim koracima na putu BiH ka Evropskoj uniji.

Delegacija EU u BiH organizovala je niz sastanaka kako bi razgovarali sa stručnjacima iz različitih oblasti o Mišljenju Europske komisije o zahtjevu Bosne i Hercegovine za članstvo u EU. Direktor Udruženja poslodavaca FBiH Mladen Pandurević prisustvovao je jednom takvom sastanku i sa šefom Delegacije Evropske unije u Bosni i Hercegovini i specijalnim predstavnikom EU Larsom - Gunnarom Wigemarkom i ostalim sudionicima razgovarao o detaljnoj analizi na kojoj je zasnovano Mišljenje kao i o početnim procjenama uticaja budućeg pristupanja Bosne i Hercegovine u nekim ključnim područjima strateških politika.

Evropska unija pruža smjernice organima vlasti u zemlji u pogledu reformskih prioriteta na putu zemlje ka članstvu u EU. Dijalog o politikama djelovanja između Evropske komisije i Bosne i Hercegovine se odvija od 2009. godine u skladu sa Privremenim sporazumom, a od 2015. u skladu sa Sporazumom o stabilizaciji i pridruživanju (SSP). Mišljenje je definisalo oblasti iz SSP-a u kojima Bosna i Hercegovina treba uložiti manje ili veće napore da bi ostvarila napredak: od obrazovanja, zapošljavanja, do bolje poslovne klime, vladavine prava, sigurnosti, javne uprave u službi građana. Napredak u ovim oblastima ne znači samo dosezanje standarda EU nego znači i bolji i kvalitetniji život građana Bosne i Hercegovine.

Poboljšanje ljudskih prava u bh. privrednom sektoru

Kako bi se osiguralo veće poštivanje ljudskih prava u privrednom sektoru, Institut za razvoj mladih KULT u saradnji sa Udruženjem poslodavaca FBiH i uz finansijsku podršku EU su pokrenuli inicijativu za poboljšanje ljudskih prava u privrednom sektoru u BiH.

Svjesni da se BiH suočava s problemom nedovoljnog poštivanja osnovnih ljudskih prava u privrednom sektoru, a s druge strane da ne postoje relevantni statistički podaci o negativnim korporativnim utjecajima na ljudska prava, ove dvije organizacije su poduzeli niz koraka koji bi trebali doprinijeti poboljšanju trenutnog stanja u ovoj oblasti.

Kako bi se utvrdilo trenutno stanje i uvidjeli načini na koje je moguće praviti promjene, prvobitno su organizovane javne konsultacije sa privrednicima u više bh. gradova. Konsultacije su koristile i u izradi upitnika na osnovu kojeg će se ispitati trenutno stanje korporativne odgovornosti za poštivanje ljudskih prava u Bosni i Hercegovini.

Upitnik je namijenjen privrednom sektoru i preduzećima koje će ispunjavanjem upitnika dati doprinos u realizaciji inicijative. Inicijativa nastoji uspostaviti standardnu politiku i praktična uputstva i predstaviti je bh. preduzećima. Aktivnosti u okviru inicijative direktno će podržavati i promovirati široj javnosti konkretne programe za korporativno volontiranje. Pomagat će preduzećima i organizacijama građanskog društva u Bosni i Hercegovini u zaštiti ljudskih prava te podržavati pristup prilagođen marginaliziranim grupama.

UO Grupacije poslodavaca SBK: Privredi prijeti kolaps ukoliko se hitno ne usvoje zakonska rješenja za rasterećenje privrede i poboljšanje poslovnog ambijenta



Upravni odbor Grupacije poslodavaca Srednjebosanskog kantona/Kantona Središnja Bosna pri Udruženju poslodavaca Federacije Bosne i Hercegovine pruža punu

podršku Udruženju poslodavaca FBiH u aktivnostima koje provode s ciljem realizacije „Inicijative 20+5+6”. Radi se o setu zakonskih rješenja i inicijativa upućenih Vladi i Parlamentu FBiH s ciljem rasterećenja privrede i poboljšanja poslovnog ambijenta.

„Sve aktivnosti koje provodi Udruženje poslodavaca FBiH u cijelosti podržavamo. Naša podrška se naročito odnosi na na „Inicijativu 20+5+6”. Uzimajući u obzir teže uvjete za poslovanje kompanija i ukoliko se u najskorije vrijeme ne donesu zakonska rješenja koja će poboljšati poslovni ambijent, naročito u segmentu fiskalni i parafiskalnih opterećenja na poslovanje i rad, našoj privredi prijeti kolaps. Zbog svega navedenog, pozivamo odgovorne u Vladi i Parlamentu FBiH da hitno reagiraju i usvoje barem dio najnužnijih prijedloga zakonskih rješenja koja je dostavilo UPFBiH. Pozivamo i molimo sve institucije i pojedince da hitno i neodložno ispune svoj dio obaveza, kako bi se što prije stvorili povoljniji uvjeti za poslovanje, posebno u realnom sektoru”, kaže predjesnik UO Grupacije poslodavaca SBK pri UPFBiH Kemal Čolak.

Iz UO Grupacije poslodavaca SBK najavljuju da će u narednom periodu intenzivirati aktivnosti prema Vladi i Skupštini SBK s ciljem što hitnijeg rješavanja gorućih pitanja za poslodavce, a koja su u kantonalnoj nadležnosti.

Podsjećamo, sredinom aprila zastupnici Zastupničkog doma Parlamenta FBiH su na tematskoj sjednici posvećenoj rasterećenju privrede i poboljšanju poslovnog ambijenta, jednoglasno usvojili zaključak kojim se od Vlade FBiH traži da u roku od 60 dana u parlamentarnu proceduru dostavi prijedloge novih te izmjene i dopune postojećih zakona koje je pripremilo Udruženje poslodavaca FBiH. Danas je tačno 90 dana od dana usvajanja ovog zaključka, a Vlada BiH još u parlamentarnu proceduru nije uputila niti jedan prijedlog novog ili izmjene i dopune postojećih zakona koje su predložili poslodavci. Iz UPFBiH još jednom apeliraju na Vladu FBiH da hitno razmotri i u parlamentarnu proceduru dostavi predložena zakonska rješenja.

Sastanak članova Vlade USK i Grupacije poslodavaca Unsko-sanskog kantona pri UPFBiH

U Vladi Unsko-sanskog kantona 22. jula 2019. godine održan je prvi sastanak Grupacije poslodavaca Unsko-sanskog kantona pri Udruženju poslodavaca FBiH s Vladom USK. Razgovaralo se o tome kako olakšati rad privatnim subjektima.

Predstavnici Grupacije poslodavaca Unsko-sanskog kantona pri Udruženju poslodavaca FBiH pripremili su te dostavili premijeru Vlade USK Mustafi Ružniću inicijative za

rasterećenje privrede i inicijative za uključivanje socijalnih partnera na sjednicama Skupštine USK, odnosno koje će omogući prisustvo i učešće u raspravi u pojedinim radnim tijelima na kojima se raspravlja o pitanjima koja su značajnog interesa za socijalne partnere.

Inicijate se odnose na izmjene i dopune Poslovnika Skupštine USK, donošenje Zakona o izmjenama i dopunama Zakona o administrativnim taksa i tarifi kantonalnih



administrativnih taksa, donošenje Zakona o izmjenama i dopunama Zakona o sudskim taksa USK, formiranje koordinacionog tijela za parafiskalne namete u USK, izmjene i dopune Poslovnika o radu Vlade USK, te Inicijativa za donošenje Uredbe o procjeni uticaja propisa.

- Svaki dan se morate baviti nekim papirom, stvori se problem. Uglavnom je to administracija svih nivoa i vi se time bavite. Dobijete neki zadatak kojim se morate baviti, a ne svojim poslom - istakao je predstavnik Grupacije Edin Ibrahimpašić.

Vlada Unsko-sanskog kantona zahtjeve i inicijative Grupacije smatra opravdanim, istaknuto je na sastanku.

U narednih mjesec dana bit će formirano koordinacijsko tijelo koje će činiti predstavnici Vlade, privatnog i javnog sektora, a koje će imati ulogu da spoji njihove potrebe, mogućnosti i interes.

- Sačinit će se set mjera kako poboljšati privredu, prije svega, kroz pobrojavanje nameta koje naši privrednici imaju i kako ih umanjiti - kazao je premijer USK-a Mustafa Ružnić.

Održana sjednica UO Grupacije poslodavaca ZDK pri UPFBiH

Sjednica Upravnog odbora Grupacije poslodavaca ZDK pri Udruženju poslodavaca FBiH održana je 12. jula 2019. godine.

Nakon usvajanja Zapisnika sa prethodne sjednice Upravnog odbora, članovi su razmatrali materijale za predstojeću sjednicu Ekonomsko - socijalnog vijeća ZDK, s posebnim akcentom na Program rada Vlade ZDK za 2019. godinu. Zaključeno je da



je potrebno u sklopu Programa rada Vlade ZDK za 2019. godinu definisati programske

ciljeve i formirati ekspertne grupe koje će raditi na rasterećenju privrede u saradnji sa Udruženjem poslodavaca FBiH, reformi obrazovanja, te reformi Zavoda za zapošljavanje ZDK i Zavoda zdravstvenog osiguranja ZDK. Fokus ekspertnih grupa bi bio i iznalaženje novog modela dodjele poticaja za privrodu, zapošljavanje i poljoprivredi, kao i rekonstrukcija upravljanja u javnoj upravi, javnim preduzećima i rudnicima na nivou ZDK u saradnji sa Vladom FBiH.

Preporučeno je da se u Program rada Ekonomsko-socijalnog vijeća ZDK za 2019. godinu uvrsti inicijativa za ukidanje i smanjenje parafisklanih nameta i inicijativa za reformu javne uprave. Članovi UO će također zatražiti da se na sjednicama Vlade ZDK obavezno razmatra po jedna tačka sa sjednice ESV-a, te će instirati na sprovedbi zaključaka ESV-a.

Konstatovano je da Grupacija poslodavaca ZDK pri UPFBiH još uvijek nije dobila odgovor na dopis premijeru Vlade FBiH u kojem se traži smjena odgovornih JP Ceste FBiH zbog šteta koje su nanesene privredi uslijed rekonstrukcije tunela Vranduk, te da će Grupacija uputiti urgenciju Vladi FBiH.

Sjednica ESV-a ZDK o Programu rada Vlade i Ekonomsko-socijalnog vijeća

Na sjednici Ekonomsko-socijalnog vijeća ZDK, održanoj 15. jula 2019. godine, razmatran je Program rada Vlade Zeničko-dobojskog kantona za 2019. godinu, Prijedlog Programa rada Ekonomsko-socijalnog vijeća za period juli-decembar 2019. godine, te Smjernice ekonomske i fiskalne politike Zeničko-dobojskog kantona za period 2020.-2022. godina.



Socijalni partneri jednoglasno su usvojili dokumente, te dali podršku radu Vlade za realizaciju postavljenih programskih ciljeva. Delegacija poslodavaca u Ekonomsko-socijalnom vijeću ZDK izkazala je potrebu za razmatranjem tematskih oblasti na sjednicama ESV-a, te se

zadužuju socijalni partneri da u roku od 15 dana delegiraju teme za Tematski program rada ESV-a za mandatni period ove Vlade. Također, članovi Ekonomsko-socijalnog vijeća ZDK primili su k znanju Smjernice ekonomske i fiskalne politike Zeničko-dobojskog kantona za period 2020.-2022. godina.

Koordinaciono tijelo za parafiskalne namete KS o izmjenama Zakona o sudskim taksama i Zakona o komunalnim djelatnostima

Na četvrtoj sjednici Koordinacionog tijela za parafiskalne namete KS, održanoj 19. jula 2019. godine u prostorijama Ministarstva finansija KS članovi su razmatrali Nacrt zakona o izmjenama i dopunama Zakona o sudskim taksama, odnosno inicijative Ministarstva finansija KS i Udruženja poslodavaca KS za izmjenu navedenog zakona, te inicijativu za donošenje Zakona o izmjenama i dopunama Zakona o komunalnim djelatnostima.

Udruženje poslodavaca KS je pripremilo inicijativu za donošenje Zakona o izmjenama i dopunama izmjene Zakona o sudskim taksama čiji je cilj smanjenje sudskih taksi koje se plaćaju u postupcima pred Općinskim i Kantonalnim sudom u Sarajevu, u svrhu rasterećenja poslodavaca i smanjenja parafiskalnih nameta.

Zaključeno je da će predstavnici Ministarstva finansija KS u narednom periodu održati sastanak sa predsjednicom Općinskog suda u Sarajevu i raspravljati o inicijativi UPKS, te da će se na idućem sastanku Koordinacionog tijela sačiniti konačna verzija inicijative koja će se uputiti Vladi KS.

Nadalje, inicijativa Udruženja poslodavaca Kantona Sarajevo za donošenje Zakona o izmjenama i dopunama Zakona o komunalnim djelatnostima odnosi se na to da kriterij za određivanje cijene za odvoz otpada bude količina otpada, a ne veličina poslovnog prostora, jer se trenutno cijena određuje prema metru kvadratnom, a ne prema količini otpada. Takvo rješenje nije objektivno, u velikoj mjeri oštećeće privrednike i stvara dodatna opterećenja i otežava poslovanje.

Koordinaciono tijelo za parafiskalne namete u Kantonu Sarajevo uputit će dopis Vladi Kantona Sarajevo u kojem predlaže da u što skorije vrijeme zaduži Ministarstvo komunalne privrede i infrastrukture da pristupi analizi cjenovnika KJKP „RAD“ d.o.o. Sarajevo i izradi kriterija koji bi na pravičan način utvrdili cijene usluga prikupljanja i odvoza smeća zavisno od vrste i količine usluge, a uz vođenje računa o tome da ne bude ugroženo funkcionisanje KJKP „RAD“.

Rezultati ankete o učeničkoj pismenosti u BiH bit će prezentovani početkom decembra 2019. godine



Sastanak Poslovnog vijeća o edukaciji održao se 09. jula 2019. godine u prostorijama UN-a u Sarajevu. Fokus sastanka je implementacija PISA (Program za

međunarodnu procjenu učenika) u BiH, a podržali su ga Ambasada SAD i Misija OSCE-a u BiH. Sastanku su prisustvovali i ambasador Sjednjениh Američkih Država u BiH Eric Nelson, predstavnici Delegacije EU u BiH, OSCE-a i kompanija. Ispred Udruženja poslodavaca FBiH sastanku je prisustvovao pomoćnik direktora Zlatan Dedić.

PISA je trogodišnja međunarodna anketa koja ima za cilj da evaluira obrazovne sisteme širom svijeta testiranjem vještina i znanja 15-godišnjih učenika. BiH je po prvi put učestvovala u testiranju prošle godine (2018. godine). Glavni fokus je bio na čitalačkoj pismenosti pored matematičke i naučne pismenosti. Rezultati, koji će biti predstavljeni početkom decembra ove godine, pružit će dokaznu bazu o tome koliko djeca u BiH zapravo uče, te ukazati na ključne aspekte kvalitete osnovnog obrazovnog sistema u zemlji.

Nova usluga UPFBiH - obavljanje stranih organizacija o aktivnostima UPFBiH

Udruženje poslodavaca FBiH zastupa prava i interes svojih članova radeći na stvaranju uslova za povoljnije poslovno okruženje. U cilju da se glas poslodavaca čuje na svim nivoima, širimo spektar svojih usluga.

U svrhu poboljšanja informisanosti o radu Udruženja poslodavaca FBiH, dva puta mjesečno Udruženje će međunarodnim organizacijama, ambasadama i drugim stranim organizacijama dostavljati pregled najznačajnijih aktivnosti Udruženja na engleskom jeziku.

UPFBiH - udruženje socijalno osjetljivih i društveno odgovornih poslodavaca

Humanitarno-karitativna organizacija Kruh sv. Ante uputila je dopis Udruženju poslodavaca FBiH u kojem se zahvaljuje na donaciji u iznosu od 1.000 KM.

"Sredstva smo usmjerili na pomoć siromašnima i bolesnim osobama u stanju socijalne potrebe s ciljem povećanja kvalitete njihovog života. Potrebe su velike i sve je više osoba koji nam se obraćaju za pomoć. Kako bi svim osobama u potrebi mogli pomoći, potrebna nam je pomoć dobročinitelja. Stoga se iskreno zahvaljujemo na iskazanom dobročinstvu i solidarnosti te kontituiranoj pomoći i podršci našim projektima", navodi se u dopisu.

Nove članice Udruženja poslodavaca FBiH

MBA Centar d.o.o. Sarajevo je preduzeće osnovano 1992. godine. Osnovna djelatnost preduzeća je proizvodnja pekarskih i slastičarskih proizvoda, kao i proizvodnja jufke i pita. Proizvodi MBA Centra d.o.o. su, između ostalih, Bavarski MBA hljeb, Švicarski MBA hljeb, Švedski MBA hljeb, Velešićki hljeb, Zlatni tost, a od peciva poznati su po Kraljevskom i Kraljevskom kukuruznom pecivu, Rezanom hot-dog pecivu i Rezanom hamburger pecivu, te torta Filadelfija koja je jedinstvenog okusa. Osim toga, MBA Centar je vrlo uspješan u pripremi cateringa - kanapea i minjona ili gotovih jela za male ili velike događaje, a obezbijeđeno je i posluživanje ukoliko to kupac želi.



MBA Centar se bavi i ugostiteljstvom, a gotova ili a'la carte jela nude u objektima - Maloprodaja Slatko i Slano u Velešićima, Restoran Slatko i Slano Socijalno i Restoran Slatko i Slano Vogošća.

Uspjeh MBA Centra je omogućilo oko stotinjak uposlenih, a mnogi od njih su od samog početka. Poslovni i proizvodni centar je smješten u Vogošći na lokaciji površine 6.000 m². Proizvodnja je organizovana u modernoj proizvodnoj hali površine 2000 m², koja je opremljena savremenim tehnološkim linijama: automatizovanom linijom za pečenje i pakovanje, automatizvoanom linijom za proizvodnju jufke i pita, automatskim pogonom za doziranje brašna i aditiva, itd.

Asocijacija poduzetnika Hercegovine djeluje kao udruženje poslodavaca, s osnovnim ciljem poticanja razvoja povoljnog okruženja za privredni razvoj i očuvanja poslovnog morala. Zajedničkim snagama članova organizacije Asocijacija ustrajno razvija i provodi aktivnosti koje doprinose razvoju regije Hercegovine kao snažnog privrednog i urbanog regionalnog središta.

Regiju Hercegovine Asocijacija predstavlja tokom svih aktivnosti nikad nepropuštajući priliku da budu tamo gdje ih članice trebaju. Intencija Asocijacije je mrežu poduzetnika još više ojačati kako bi zajedno mogli uticati na sve negativne segmente s kojima se poduzetnici/organizacije susreću, a sa ciljem stvaranja boljih poslovnih prilika, boljeg umrežavanje te na kraju krajeva sigurnog APH partnera.

Vizija Asocijacije poduzetnika Hercegovine je postati katalizator privrednog i društvenog razvoja regije kroz pružanje podrške izgradnji umrežene poslovne zajednice u kojoj saradnja povećava kapacitet, obrazovanje pojačava sposobnost i zagovaranje utiče na autoritet. Misija Asocijacija poduzetnika Hercegovine je da osnaže kompanije u ostvarenju svog punog potencijala, potiče stvaranje povoljnog okruženja za priredni razvoj i stvara snažno umreženu zajednicu poslodavaca.

Prednosti članstva u Asocijaciji poduzetnika Hercegovine su povezivanje s poslovnim partnerima, zastupanje zajedničkih interesa u odnosima sa predstavnicima vlasti, državnim institucijama, sindikatima, nevladinim organizacijama i drugim organizacijama, povećanje vidljivosti kompanija, te pristup informacijama od značaja sa poslodavcima i mogućnosti pronalaska poslovnih partnera putem istih.

Kompanija Ledo je vodeći prizvođač sladoleda i smrznute hrane u regiji. LEDO d.d.

Čitluk je dio 50 godina duge tradicije u proizvodnji i prometu smrznute hrane. Originalnu kvalitetu proizvoda izgradili su primjenom vrhunskih umijeća i dugogodišnjih iskustava zaposlenika, te primjerenim njegovanjem kulture kvalitete.

Tokom 50 godina postojanja LEDO imena razvijena je široka paleta kvalitetnih smrznutih proizvoda, što je od velikog značaja za potrošače kao i za nastup na tržištu.



Paralelno s rastom kompanije Ledo je razvio pozitivan i prepoznatljiv imidž, te ga tržište prepoznaće kao veliku i snažnu, dinamičnu kompaniju koja nudi odlične, zdrave i ukusne proizvode.

Više o kompaniji pričitajte na [oficijelnoj stranici](#).



UDRUŽENJE POSLODAVACA

UDRUŽENJE POSLODAVACA FBiH

MULA MUSTAFE BAŠESKIJE 12/3, 71 000 SARAJEVO

TEL: 00 387 264 830

FAX: 00 387 33 552 461

MAIL: info@upfbih.ba

WEB: www.upfbih.ba